

Սրա ծննդյան թվականը մեզ անհայտ է, բայց ինչպես Մատթեոս Ուռհայեցին է պատմում, ծերության հասակում հանկարծամահ է եղել Ուռհա (Եղեսիա) քաղաքում հայոց ՇԼԴ (534) և մեր 1085 թվականին: Եթե ծերության հասակը համարենք 80 տարին, նշանակում է, նա ծնված պետք է լինի 11-րդ դարի առաջին տասնամյակում:

Ուռհայեցին Հակոբ Սանահնեցուն հիշատակում է հայոց անվանի մտավորականների՝ Կողեռնի, Լաստիվերտցու, Դիոսկորոսի և այլոց շարքում¹: Նրա մահվան առթիվ գրում է.

«Դարձեալ ի թուականութեանս հայոց ի յամի ՇԼԴ մեռաւ Հայոց վարդապետն Յակորոս Քարաբնեցին, որ յորշորջեալ կոչէր Սանահնեցին, այր հզօր և կորովի: Սորա հասեալ ի վերայ հին և նոր կտակարանացն Աստուծոյ, ուսեալ և հասեալ սորա ի վերայ հոետորական իմաստութեանցն և տեղեկացեալ ամենայն փիլիսոփայական խորին գիտութեանցն. սա էր յաշակերտաց մեծին Դէոսկորոսի հօրն Սանահնին»²:

Դավանաբանական փիլիսոփայական հարցերում մեծ հմտություն ունենալու շնորհիվ 1065 թվականին Վասպուրականի Սենեքերիմ թագավորի Ատոմ և Ապուսահլ որդիների հետ միասին գնաց Բյուզանդիա հայկական ու հունական դավանանքների միացման խնդրով և իր ձառերով հույների համակրանքը շահեց («և հաճեալ ի բանս նորա ամենայն տունն Յունաց» (Ուռհ., էջ 227):

Սակայն, Հակոբոս Սանահնեցին Քրիստոսի երկաբնակության հարցում հույների հետ որոշ համաձայնության եկավ իր՝ հայոց և հոռոմոց միաբանության թղթում, որի հետևանքով հույները ուրախությամբ համաձայնվել էին հայոց դավանանքը միացնել հունականին, բայց այդ բանը միանգամայն անընդունելի էր հայերի համար, որովհետև, հայոց դավանանքը հունականին

միացնելով, հայերը հունադավան կղառնային, կխախտվեր նրանց ազգային ինքնությունությունը, ուստի Կարսի Գագիկ թագավորը շտապ կերպով մեկնեց Բյուզանդիա, դեմ գուրս եկավ միացմանը և Հակոբոս վարդապետի միաբանության թուղթը չեղյալ հայտարարելով, ինքը, որ թագավոր լինելով հանդերձ նաև գիտնական էր, նոր գիր գրեց հայոց դավանանքի սկզբունքների մասին: Այդ գրի բովանդակությունը պահպանվել է Մատթեոս Ուռհայեցու ժամանակագրության մեջ³: Դրանով փրկեց հայերին հունադավանությունից:

Հակոբոսի անունով մնացել է մի շարական:

Աճառյանը Դիոսկորոսին 1039 թվականից հետո մեռած է համարում⁴: Դա ահնեբը խալ է, որովհետև 1061 և 1063 թվականներին նրա անունով երկու արձանագրություն է պահպանվել Սանահնի վանքում (արձ. 105 և 179): Այդ երկու արձանագրությունների մեջ էլ Դիոսկորոսը հայրապետ տիտղոսն է կրում և թագավորի անվան հետ է հիշատակվում իբրև կաթողիկոս⁵: 1063 թվականի արձանագրության մեջ Դիոսկորոսի անունն ավելի առաջ է գրված, քան Կյուրիկյան Կյուրիկե և Սմբատ թագավորների անունները:

«Ի ՇԺԲ թուին հայոց, ի հայրապետութեանն տեառն Դէոսկորոսի, ի թագաւորութեանն Կիւրիկէի և Սմբատայ...» (արձ. 179):

Հասկանալի է, որ վանահայրն այդպիսի պատվի չէր կարող արժանանալ և Դիոսկորոսն այդ արտոնություններին արժանացել է միայն այն պատճառով, որ նա իրեն կաթողիկոս է համարել և իր վրա պահպանել է հայրապետ տիտղոսը:

Նշանակում է, 1039 թվականին կաթողիկոսությունից հեռացվելուց հետո Դիոսկորոսը դարձյալ Սանահնի վանքում առաջնորդ է կարգվում և այդ պաշտոնին մնում է առնչվազն մինչև 1063 թվականը, որի մասին տեղեկություն ունենք Սանահնի մատենադարան

¹ Մատթեոս Ուռհայեցի, Ժամանակագրութիւն, Վաղարշապատ, 1898, էջ 226—227:

² Անդ, էջ 226—227:

³ Անդ, էջ 163—178:

⁴ Աճառյան, Անձնանունների բառարան, հատ. Բ, էջ 71:

⁵ Աճառյանն այս արձանագրությունների մեջ հիշատակվող Դիոսկորոսին այլ մարդ է համարում, առանց հաշի առնելու, որ նա կրում է հայրապետ տիտղոսը և հիշատակվում է թագավորների հետ միասին: Տե՛ս Անձնանունների բառարան, հատ. Բ, էջ 71: